

1621

L'HERACLITE COVRTISAN.

Ve, va, va, Superbia commune Nobilitatis malum.



A PARIS,

Chez la veufue d'ANTHOINE COVLON,
ruë d'Escoffe, aux trois Cramailles.

M. DC. XLIX.

AVEC PERMISSION.

1621
817



L'HERACLITE

COVRTISAN.

VÆ, VÆ, VÆ.

Superbia commune Nobilitatis malum.



E commencement & la fin de tout pechié doiuent terminer & borner ce discours de part & d'autre ; d'autant que nostre dessein est d'y représenter tout au long, comme en vn tableau racourcy, l'Orgueil & la Superbe avec les plus viues couleurs, que les meilleurs ouuriers de toute l'Escole de la Philosophie Chrestienne luy ont baillé ; & desquels je me sers, afin que, comme dans vn miroüer, les Orgueilleux & les Superbes puissent se connoistre. Disant, en passant, que personne ne mesçauoit louer ny blasmer, sans s'offenser soy-mesme. Car si quelqu'un me blasme, ce sera par vanité, & sous l'assurance qu'il a de son propre jugement, qu'orgueilleusement il fait juge de moy : Et d'autre part s'il me loue, autant luy en arriuera-il. De sorte que ie me mets à l'abry de l'un & de l'autre, me contentant seulement d'estre veu, sans ostentation, par celuy qui en voudra prendre la peine : Et tel me verra, qui ne sçaura pourtant de quel pied ou artifice je marche ; d'autant que mon ordre est artificieux dans son desordre. Que personne aussi ne me die avec l'Apostre, que voulant enseigner autrui, je ne m'enseigne pas moy-mesme. Car j'apprens que la Superbe est la racine de tous maux & la

Reine de tous vices. Elle produit la vaine gloire, l'enuie, la colere, la tristesse, l'auarice, la gourmandie, & paillardise, qui sont autant de chaisnons par lesquels le mauuais Demon nous maistrise: Et quelque œuure que l'on se puisse imaginer, si les autres vices sont excusables & passables, la seule Superbe est odieuse. Voila le premier trait de crayon, qui a poussé vn saint Pere & Docteur de l'Eglise à dire, que la Superbe a donné commencement à nostre salut: car elle a esté cause de nostre Redemption. Je souhaiterois bien volontiers que le commencement & la suite de tout ce discours fust le commencement de nostre connoissance, & puis nostre salut: Je parle en general, d'autant que ce vice a son principe enraciné si fort en la masse de toute nostre Nature humaine, qu'il seroit aussi difficile de l'arracher comme de tirer vn thresor hors de terre.

Democrates grandement chargé d'années, s'efforçoit vn jour de monter en vne haute forteresse, qui estoit dans la ville d'Athenes, & luy plust de dire, en perdant halaine, qu'il faisoit ne plus ne moins que tous les Citoyens de cette ville, c'est qu'il respiroit beaucoup, & faisoit peu. Ne plus ne moins aussi qu'un membre enflé de mal n'est pas bien propre à faire seruice: de mesme vn Esprit enflé de Superbe & d'Orgueil est mal propre à tout bien: car il est emporté d'un desir desordonné d'auoir & de jouir de l'honneur, que luy mesme deuroit rendre à vn autre: ce qui est vn défaut fort remarquable en ce que principalement il heurt la Diuinité, & ne peut se borner ny captiuer dans aucune regle ou mesure finie. Mais ie dis bien plus, comme ce vice a esté le premier pour ces Esprits, qui ont perdu la gloire, il est aussi le dernier pour ceux qui en veulent approcher. La Palme (qui est le symbole de la vertu) a cela de propre, que plus elle est affaisée & abbatuë, plus elle se releue, & se remet en son premier estat: la Superbe pareillement se veut faire voir d'autant plus, que l'on la veut cacher & affoiblir: Mais au lieu de porter la personne à la vertu, elle la rend du tout indisposée & inhabile à icelle.

Nous remarquons avec plusieurs, que la Superbe ruine toute sorte de bons desseins; & quant aux biens de la Fortune elle est comme vn vermisseau qui les ronge; aussi est-il impossible à vn superbe de les conseruer. Quant à ceux de l'esprit & du corps par succession de temps elle les fait perdre. Elle est mere du

Diable dans le Ciel; & a donné la mort à l'homme, qui se pouuoit attendre à la Beatitude qui luy auoit esté promise. Bref, c'est la mere de tous maux; la fontaine de toute impieté, & de toute meschanceté. Elle a mis bas Goliath; fait pendre Aman; tué Nichanor & Antiochus; submergé Pharaon; perdu Sennacherib, avec plusieurs autres Grands. L'on dit aussi, que les foudres tombent plus souuēt sur les hauts edifices; & pour l'ordinaire nous voyons aussi, que ceux qui ayant surmonté leurs ennemis, viennent à s'enorgueillir, sont en peu de temps plus estonnez que ceux qu'ils brauoient & moquoient. Artabanus dissuadoit par cette remontrance le Roy Xerxes, de faire la guerre contre les Grecs. Phylisthion disoit aussi, que la Fortune se joüoit de l'hôme, l'esleuant bien haut, pour luy donner vne cheute plus grande & plus rude: ce qui est beaucoup plus remarquable que la comparaison faite par saint Ierosme, qui dit, que comme le vin fait tort au beueur, lequel estant releué, n'a pied ny esprit qui puisse faire son office ou deuoir; & que toute tristesse & réjouissance cesse alors: L'hôme superbe qui est plein de desseins ne viendra aussi jamais à bout du plus aisé & plus facile. Il ressemble (dit Folengius) à la fumée, laquelle veut touïours monter: enfin estant paruenüe à l'air, s'éuanoüit, & ne se connoist plus: le superbe a aussi cette volonté d'estre par dessus tout; & lors qu'il a bien monté, il se trouue perdu & égaré, ce n'est plus luy. Et ne plus ne moins que le feu qui veut estre seul, il n'a voulu se meller ou joindre à quelque chose; il est passé, & où?

Chacun sçait bien toutefois, que la Superbe a coustume de s'associer avec les richesses. Mais quelle ingratitude est-ce (dit saint Ierosme) de se bander contre celuy duquel on tient la vie, & de mespriser ses commandemens, puis qu'il ne cherche que les occasions & les sujets de recompenser? Ne faut-il pas juger que c'est manque de jugement? Le Superbe est tel; car il mesprise les Commandemens de Dieu, duquel il tient tout ce qu'il est. Quant à la Superbe, qui est voilée de quelque signe d'humilité, elle est encores beaucoup plus estrange & difforme, d'autant qu'elle bat & attaque les vertus, qui la ternissent de telle sorte, qu'à peine la connoist-on que par quelques signes, comme par vne rudesse en paroles, vne amertume au silence, vne dissolution meslée dans la joye; vne fureur dans la tristesse; vne honnesteté en l'apparence des honnestes

deshonneste en l'action, vne aigreur parmy la reprehension : & pour peu qu'il y ait de superbe meslée avec la vertu, elle perd son lustre, ainsi que peu de fiel est suffisant de rendre amer tout suc pour doux qu'il soit. Platon ayant vn jour conuié certains Philosophes, & entre autres Diogenes; Il auoit fort bien préparé sa maison, & orné la salle en laquelle il les deuoit traicter, de liëts couuerts de beaux tapis, avec ses plus precieux meubles. Diogenes si tost qu'il fut entré, il commença à fouler aux pieds ses beaux tapis: Auquel Platon s'adressant, luy dit, *Que fais tu là Diogenes? Je foule aux pieds,* respondit-il, *l'orgueil de Platon.* Mais Platon repartit de bonne grace, *Voire, mais c'est par vn autre orgueil.* Letenant d'vn plus grand fast & orgueil, dont il estoit saisi en foulant ses tapis, que non pas luy mesme en les possédant. Que dirai-je de cét autre Philosophe tant fameux, auquel à cause d'vn manteau tout deschiré qu'il portoit, son compagnon reprocha qu'il voyoit par les trous de son vestement, la Gloire & la Superbe qui estoit cachée deffous. Et dit-on qu'il n'appartient qu'à vn Esprit grandement malade de se laisser emporter dans le chariot de superbe, duquel les quatre cheuaux attelés sont le desir de commander, la joye de sa propre loüange, le mespris & la desobeissance: & les roües sont l'ambition & l'arrogance: le Cocher ou Conducteur, c'est l'homme meschant.

Ha! si l'homme, qui n'est que terre & cendre, regardoit souuent, & jettoit les yeux sur soy, sur les ordures & immondices qui sortent de ses oreilles, de ses yeux, de son nez, de sa bouche, où passent les choses qui chatouillent plus son appetit, & de tout son corps: quelle occasion trouueroit-il au monde de s'enorgueillir? De son Esprit, non: car il est muable, changeant, inconstant, ignorant tout ce qu'il peut: Il n'emporte que l'escorce des sciences, & ne scauroit jamais venir à la perfection; & encores s'en esloigne-il lors qu'il se rend superbe: car ce vice émousse la pointe de son Esprit, & obscurcit la verité de toutes choses. Plusieurs Roturiers veulent faire les Nobles: plusieurs pauvres contrefaire les riches: plusieurs se contentent de changer d'habits, & non pas de mœurs. Ce qu'ils ont acquis à prix d'argent, ils veulent faire croire qu'ils l'ont obtenu par leurs merites: & le plus souuent sont si fols, qu'ils s'imaginent estre aussi éleuez que les plus hautes tours du monde, & plus encores. L'oiseau qui vole bien haut par dessus les filets n'est pas pour cela plus hors de danger d'estre pris, que celuy qui ne vole point du tout, ou du moins fort peu: d'autant que l'Oiseleur l'attrape au glud, lors qu'il s'abat, & ainsi le prend à la main bien plus

facilemēt que s'il estoit dans ses filets. L'Orgueilleux & Superbe aussi, bien qu'il marche sur la terre, & ne passe qu'en imagination par dessus les buissons qui l'accrochent, il se trouue bien souuent enlassé dās ses passions, en sorte qu'il ne s'en peut dépestrer : Mais, qui plus est, il est tellement enyvré & aueuglé deses mesmes passions, que, comme vn aueugle peut estre trompé facilement de tout le monde; aussi est-il aisé de le tromper. Or pour empescher del'estre, il faut chasser ce vent de faste & d'ambition, qui enfle sa presumption, & le fait pretendre à tout ce qu'il se peut imaginer; d'autant que ses desirs ne sont point bornez.

Le Superbe ne butte pourtant qu'à choses grandement hautes & dans le Ciel, comme à son origine, sans y pouuoir paruenir, pour autant quel'Orgueil en a esté chassé, & quel'entrée luy en est interdite: d'autant aussi qu'il en a perdu la piste & la voye, & s'est pleu depuis aux injurés, ne s'est peu accommoder à les supporter, il est deuenu paresseux pour obeir; fort importun & fascheux enuers les vns & les autres. Bref, il corrompt tellement la volonté des hommes, qu'on ne les connoist plus, & semble que pour cela mal à propos on blasme les richesses, disant, qu'elles orgueillissent l'homme. Et deuroit-on s'attaquer à sa volonté, qui n'est pas conduite de la sorte qu'elle deuroit estre. Car si le Superbe pouuoit, je dis pouuoit, mais il ne peut, il voudroit paroistre beaucoup plus excellent, beaucoup plus riche, & beaucoup plus grand qu'il n'est, qu'il ne peut, & ne pourra estre. O aueuglement! ô fol appetit! Saint Bernard dit, Que c'est vne honte effrontée, & vne inciuilité intollerable quel'hōme, qui n'est qu'un vermisscau de terre, vueille estre prisé & estimé. Et le Fils de Dieu égal au Pere Eternel, qui prend la forme de Seruiteur, veut estre humilié & deshonoré; & moy (homme) qui ne suis que poudre & cendre, qu'ordure & que pourriture, veux estre loué & estimé de tout le monde!

Il y a quatre moyens principaux & particuliers pour reconnoistre l'orgueil d'une personne: sçauoir lors qu'elle s'estime auoir quelque bien comme de sa Nature, ou lors qu'elle croid le tenir du Ciel pour recompense de ses merites: Ou lors qu'elle se vante & fait gloire de jouir de ce qu'elle n'a pas en sa possession: Ou lors qu'en méprisant les autres, elle veut paroistre, tenir & posseder ce qui est hors de son pouuoir. On y en ajouste encores quelques autres, cōme quand quelqu'un prefere son jugement à celuy de tous ses Confreres, se flatant dans la bōne estime qu'il fait de soy, & se laissant emporter à l'opinion que son

Esprit seul est Esprit de Dieu. Quand aussi celuy-là se sert des dons ou graces qu'il reconnoist en luy, sans penser qu'il en doive scauoir gré à personne, non pas mesme à Dieu. Or cōme d'une vieille playe ou vlcere il n'en sort qu'ordure & pourriture; d'une ame qui sera ambitieuse & superbe il n'en sortira aussi jamais qu'ordure, que pechez, que vices; soit en la propriété des possessions & des biens; soit en la gloire des vestemens, en la volupté du corps, par la bouche, en murmurant de quelque trauersé ou affliction; ou en commendant par trop arrogamment, se voyant dans les commoditez & les prosperitez du monde; par le cœur en agissant d'une propre volonté; & par son conseil ou aduis particulier. On dit d'Antisthenes, Qu'estant vn jour avec Platon, il vit vn cheual qui bondissoit, & faisoit plusieurs ruades en l'air, sans estre poussé de son Escuyer; tournant apres sa veuë sur Platon, il luy dit, *Tu aurois esté, ce me semble, vn tres-beau cheual.* Car le cheual est vn animal merueilleusement superbe. Que Zenon voyant vn jeune mignard & poupin, lequel allant par la ville, estoit vne heure à songer, où il mettroit vn pied deuant l'autre, de peur qu'il auoit de se soüiller & gaster, dit, que ce gentillastre auoit bonne raison de fuir & se garder de la fange & de la bouë, ne s'y pouuant voir comme dans vn miroüier. Esope s'adressant à vn jeune homme tout semblable, luy dit, *Que s'il s'attiffoit & mignardoit si curieusement pour plaire aux hommes, il employoit le temps mal à propos: Que si c'estoit pour plaire aux femmes, il auoit vn mauuais dessein.* La femme de Phocion estant vn jour en vn Bal, où il y auoit belle assemblée, & quantité de femmes superbement vestuës, & habillées richement, fut veuë toute seule n'auoir sur elle aucunes pierreries; non pas mesme vn anneau d'or à son doigt: quelqu'un de la compagnie, qui fut plus hardy que les autres, à luy demander pourquoy elle n'en portoit point? respondit sagement qu'elle faisoit gloire de la vertu, pour l'ornement de laquelle elle vouloit plaire à son mary. Nous lisons, que Sulpitius ayant pris garde que sa femme voulant sortir de sa maison, s'accōmodoit vn peu trop superbement, il la repudia, & luy dit aigrement, que la Loy n'ordōnoit, & ne luy permettoit pas qu'elle s'estudiaist de plaire à d'autres qu'à ses yeux, & que de vouloir paroistre belle aux yeux d'autrui, ce n'estoit pas sans soupçon & sans crime. Vn nommé Pambo se pourmenant vn jour dans la ville d'Alexandrie, apperceut vne femme superbement habillée, se prit à pleurer, & dire, qu'il regrettoit la perte de cette fême; & que faisant profession du Nom de Chrestien, elle ne s'estudioit pas tant de plaire à Dieu par vne bōne & sainte vie, qu'elle s'efforçoit de plaire aux hōmes débauchez par son luxe. Mais que n'eust-il pas dit à la responce de Iulia, fille del'Empereur Auguste, laquelle estant conseillée par quelqu'un de quitter vne si grande pompe, qu'elle faisoit en

ses habits, pour s'accommoder à l'humeur de son Pere, qui estoit vn grand mefnager, respondit: *Mon Pere ne se souuient pas qu'il est Cesar: mais quant à moy je me souuiens bien d'estre la fille de Cesar.* Hé! que n'eust-il pas dit aussi à Rhemnius Palaemon Grammairien, qui se vantoit, que les sciences estoient nées, & deuoient mourir avec luy: comme aussi lors qu'il appella Marc Varron vn vray pourceau. Mais de Domitian, qui commanda vn jour qu'on l'appella Dieu. Du jeune Maximin, qui faisoit baisser ses mains & ses pieds aux Senateurs. Du Roy de Perse nommé Sabor, qui se fit appeller Roy des Rois, frere du Soleil & de la Lune. De Menecrates & Salmoneus, qui vouloient qu'on les prist pour Iupiter.

I'oserois bien dire avec saint Augustin, qu'il est vtile & profitable au glorieux & superbe de tomber en quelque faute notable, afin qu'il en conçoie vn desplaisir bien grand; voire plus grand que n'est le plaisir qu'il reçoit en y tombant & la commettant. L'histoire de saint Pierre, avec plusieurs autres, desquels la Superbe a passé toute raison, nous fait assez connoistre combien Dieu & les hommes voyent & souffrent à contre-cœur. Et plust à Dieu que nous ne vissions tous les jours ceux qui de grandemēt humbles, deuiennent superbes aussi-tost qu'ils sont paruenus à quelque qualité autre qu'ils n'auoient: Nous n'aurions sujet de dire d'eux ce que l'on dit aussi de l'Auaricieux, lequel est insatiable, & ne trouue rien qui puisse assouuir son appetit: on ne verroit non plus ce que l'on a veu en ce grand Marius, & en cet Empereur Diocletian, desquels l'ambition & la Superbe n'ont point eu de tenue. Mais qu'arriue-il, & que peut-il arriuer à ceux qui seront humbles: c'est de connoistre que la Superbe precipite les orgueilleux du Ciel au profond des Enfers: & au contraire l'humilité eleue de la Terre au Ciel: L'Ange qui estoit au Ciel par la Superbe est cheu dans les Enfers, & l'homme qui est en Terre, monte au Ciel par l'humilité. Que l'humilité rend les hommes semblables à Dieu & aux Anges: Et au contraire la Superbe rend les Anges semblables aux Diables. Esope disoit vn jour à Chion, qui luy demandoit ce que Iupiter faisoit dans le Ciel, qu'il abaissoit les choses par trop hautes, & eleuoit les basses. Et bien que ce soit chose ordinaire à l'homme de s'éleuer & s'estimer quelque chose, il faut toutefois se conduire avec vne grande prudence, afin que voulant monter trop haut, on ne s'engage à vne cheute tres-honteuse, outre qu'il faut que l'homme s'estudie d'establir vne eternité par sa vertu, & non pas par la vanité de ce qu'il possède. Or, comme nous auons dit, la fin de ce discours sera pareille au commencement, pource que nous ne sōmes point sortis hors du sujet, & que le cōmencement du peché de Superbe en l'Ange est le cōmencement de la gloire en l'homme.

Vah, vah, vah. F I N.